

**NÄIMILIITON VIHKÂM**

Näimiliiton vihkâm puáhtá toimättiđ tastmaņa, ko näimiliiton áigooh lává uážžum tuodâštus näimilito estui tutkâmist.

Toh, kiäh vihkuv kirholávt, kalgeh leđe rippâškoovlâ jottáám kirho jesâneh. Jis nubbe kihlekyeimi ij lah kirho jeessân, suoi pyehtiv vihkuđ kirholávt, jis kiirkon kulluumáttum kyeimi lii eres ristâlii kirho teikâ oskoldâhkode jeessân (Kirkko-oornig 2: 18). Näimiliiton áigoi teikâ jo vihkum ulmui noomah almottuvvojeh servikode ohtâsâš immeelpalvâlusâst, jis ääšiomâhááh iä lah tom kiäldám. Sii peeleeest ruhâdâlloo immeelpalvâlus ohtâsâš ovdârukosist.

Vihkâm tooimât pappâ. Sun kalga savâstállâđ näimiliiton áigoo kuáhtásáin tast, mii näimilitto lii já maid toos Immeel sivnádâs táttum meerhâš.

Muusik valjiimist kalga väldiđ vuotân toimättâs immeelpalvâlusluándu. Toimättâsâst kolgâččij leđe kuittâg ohtâ salmâ. Muusikist västid kanttor, já tast kalga sooppâđ suin.

Vihkâm toimáttuvvoo kirhoost teikâ eres saajeest tađe mielđ ko pappâ já vihkâmpaarâ tast suápih (Kirkko-oornig 2: 19).

Vihkâmist kolgâv leđe mielđi ucemustáá kyehti tuodâšteijee. Vihkâmpaarâ asâttâttâv álttár (vihkee) oovdân nuuvt, et myerssee lii irge čizetpeln.

## I Laidiittâs

---

### 1. Laidiittâsmuusik

---

Laidiittâsmusiikkin puáhtá leđe čuojânâsmuusik já / teikâ salmâ.

### 2. Algâsivnádâs

---

Sivnádâs já vuárutiervättâs puáhtá lávlud teikâ celkkiđ.

#### Sivnádâs

**P** Eeji já + Alge já Pase Jiegâ noomân.

**S** Amen, amen, amen.

#### Vuárutiervättâs

**P** Hiärrá liävus tiigijn.

**S** Nuuvt še liävus sun tuu-uv jieggáin.

### 3. Laidiittâssäänih

Pappâ sárnu ríjjâht teikâ kiävttá juábbáá kuábbáá čuávuvvâš molsâiävtuin.

**P** Rähis usteveh, NN já NN (ovdânoomah). Tuoi leppee puáttám Immeel muáđui oovdân naaijâđ. Suu sääni kuldâlmáin já oovtâst ruhâdâlmáin áánnup näimilittosâd Immeel sivnádâs. Ráámmáttist iättoo: ”Immeel sivnedij ulmuu jieijâs kovveen. Immeel kovveen sun suu sivnedij, almajin já nisonin sun sivnedij sii. Immeel sivnedij sii.” (1. Moos. 1: 27–28)

#### TEIKÂ

**P** Rähis usteveh. Lep tääl Immeel oovdâst ánumin NN:n já NN:n (ovdânoomah) suu sivnádâs. Jeesus iätä: ”Eennâm aalgâst Immeel sivnedij ulmuu almajin já nisonin. Tondiet almai kuáda eejis já eenis já ovtâstuvvoo kálgusis, nuuvt et taah kyevtis puáttiv ohtân uázžin. Suoi iává innig lah kyehti, suoi lává ohtâ. Já mon Immeel lii ovtâstâm, tom iälus olmooš iärut.” (Mark 10: 6–9)

#### TEIKÂ

**P** Rähis usteveh, NN já NN (ovdânoomah). Ráámmáttist iättoo, et Immeel sivnedij ulmuu almajin já nisonin já tárguttij sunnuu pelikyeimin kyeimi kuáimásis. Immeel sääni kuldâlmáin já oovtâst ruhâdâlmáin áánnup näimilittosâd suu sivnádâs.

### 4. Psalmâ

Puáhtá kevttiđ meiddei kirkkoive äigimudo teikâ eres psalmâid.

Psaalmâ puáhtá lávlud teikâ luuhâđ. Ton aalgâst já loopâst puáhtá leđe antifoni.

Psaalmân labdoo Uccâ kunnee. Ton saajeest puáhtá kevttiđ salmâveerstâ 60:8. Uccâ kunnee kuáddoo meddâl västuääigi, 5. västuääigi pasepeeivi räajist.

## Antifoni

Räjitem lii Immeel rähisvuotâ,  
avalávt sun lii mijjân oskolâš.

Ps. 117: 2

## Psalmâ

Tot, kote áásá Alemuu syejeest  
já ijâstâl Puohváldálii suoivust, iätä näävt:

”Tun, Hiärrá, lah lannaam já torvopáikkám,  
Imelâm, tunjin mun turvâstâm.”

Hiärrá leevât suájáidis tuu oolâ,  
já tun lah torvoost toi vyelni.

Suu oskolâšvuotâ lii tunjin muvrâ já kolbâ.

Torvonâd lii Hiärrá,  
páikkád lii Alemuu syejeest.

Ps. 91: 1–2, 4, 9

## TEIKÄ

Hiärrá lii lyetittettee puoh sanijnis,  
oskolâš puoh tavoinis.

Puohah keččih vyerdimáin tunjin,  
já tun adelah sijnân piämu rievts ääigi.

Tun lehâstah kiedâidâd  
já pyerivuodâstâd piemah puoh mii iälá.

Hiärrá lii puohâst rievtsmielâlâš,  
sun lii oskolâš puoh tavoinis.

Sun lii alda tom, kii čuárvu suu iššeen,  
tom, kote jurgâlât suu piälán.

Sun tiävdá toi ánumijd, kiäh sust paleh,  
sun kulá sii čuárvum já iššeed sii.

Ps. 145: 13, 15–19

**TEIKÂ**

Teedi muu seeilân vááimud vuástá,  
piejâ seeilân kietâruottâsâd páádán.

Rähisvuotâ lii kievrâ tego jäämmim,  
kiijves já kallaanmettum tego tuonâ.

Ton acâkkistem lii tuulâ acâkkistem,  
ton tullânjuovčâ lii Hiärá tullânjuovčâ.

Stuorrâ čääsih iä pyevti tom časkâdid,  
virde tulve ij tuálvu tom miäldâsis.

Jis kiinii falâččij tááluid já tävirijd  
rähisvuodâ hadden,  
sun uážuččij tuše nubij pilhe.

Lavl. I. 8: 6–7

**Uccâ kunnee**

Kunnee Iäčán já Aalgan  
já Pase Jiegân,

tego lâi aalgâst, tääl lii já ain,  
avalâšvuodâst avalâšvuotân. Aamen.

**Antifoni kiärdoo****5. Rukkoos**

Rukkoosavžuuttâs puáhtá čuávvuđ uánihis joskis rukkoos.

**P** Ruhâdâllup.

## 1. Immeel, almalâš Eeči.

Tun sivnedih ulmuu almajin já nisonin  
já adelih sunnui näimilito lähjin já toimân.

Sivned NN já NN, kiäh onne naaijâv.

Kijtto, et adelih sunnuu kavnâđ kyeimi kyeimis.

Sivned taam juhle, mon tääl viettip.

Adde Kristus orrood kyessinân.

Taam ruhâdâllâp suu noomâst

2. Avalâš Immeel,

Algaad Jeesus Kristus mieldiorroom

pasottij ohtii Kaana heejâid.

Oro mieldi tääl meiddei taan hejâjuhleest

já pyevti toos ilo já kijttosmielâ.

Sivned NN já NN,

kiäh onne naaijâv.

Adde sunnui taan elimist šiev adalduvâidâd

já tuálvu sunnuu ohtii stuorrâ hejâjuhlâsâd almeest.

Kuulâ mii Jeesus Kristus, mii Hiärá peht.

3. Kristus, tun rähisvuodâ käldee.

Tun pasottih ohtii Kaana heejâid mieldioromijnâd.

Oro mieldi meiddei taan hejâjuhleest,

mast NN já NN naaijâv.

Tuálvu mii puohâid ohtii stuorrâ hejâjuhlâsâd almeest.

Kuulâ mii pyerivuodâd tiet.

4. Immeel, puohâi sivnedeijee.

Tun adelah näimilittoost almaa já nissoon

pelikyeimin kyeimi kuáimâsis

Mij kijttep tuu tast,

vâi meiddei näimilitto suonjârd

sivnedempargood pyerivuodâ já muččâdvuodâ.

Adde sivnâdâsâd NN já NN liiton,

et suoi tast uážuččáin tevidid tuu adelem tooimâ

já väldid kijttevâžžân vuástá eellim laahjijd.

Kuulâ mii tun, kote lah puoh pyerivuodâ käldee.

## 5. Almalâš Eeči.

Rähisvuodâstâd lah asâttâm näimilito  
já koččom pelikuoimijd eellid sáánád miel.

Iššeed sii rähistid kyeimi kyeimis,  
tego Kristus rähistij servikode.

Iššeed pelikuoimijd anneed näimilittoos passeen  
já nuávdittid eellimstis tuu táátu.

Adde sunnui vyeimi pissod kyeimi kuáimásis oskolâžžân.  
Kuulâ mii Algaad Jeesus Kristus,  
mii Hiärá tiet.

**S** Aamen.

## II Säáni

---

### 6. Ráámmátluuhâm

---

Lohhoo ohtâ teikâ mottoom čuávvuvâš ráámmátteevstâin. Puáhtá kevttid meiddei ráámmátteevstâid kirkkoive äigipuudâ miel teikâ eres ráámmátteevstâid.

Lohhee almoot ráámmátpitá.

Ráámmátluuhâmân puáhtá labdeđ vástádâs (psalmâ, salmâ, laavlâ, čuojânâs-muusik teikâ joskis smietâdem.)

Ruut 1: 16–17

Ruut eedâi: ”Kuus tun moonah, tohon mun-uv moonâm, já kuus tun páásáh, tohon mun-uv páásám. Tuu aalmug lii muu aalmug já tuu Immeel lii muu Immeel. Kost tun jámáh, tobbeen mun-uv táátum jäämmid já tohon mun-uv koolgâm hávdádud.”

1. Kor. 13: 1, 4–8, 13

Veik mun sárnuččim ulmui já engâlij kielâigijn mut must váiluččij rähisvuotâ, liččim tuše skilkkee veški teikâ skilijdeijee symbaal. Rähisvuotâ lii kierdâvâš, rähisvuotâ lii

läädís. Rähisvuotâ ij kaadâšt, ij räämid, ij rammuustâl, ij kevättât vyevittemeht, ij uusâ jieijâs oovdâ, ij njunáduu, ij muuštâč kiertum paaid, ij illood puástuvuodâst mut iilood tuotâvuodâ vyeitidijn. Puoh tot killáá, puohâst osko, puohâst tuáivu, puoh tot killáá. Rähisvuotâ ij kuáassin lappuu. Nuuvt pisoh taah kulmâ: osko, tuáivu já rähisvuotâ. Mut stuár-ráamus toin lii rähisvuotâ.

Ef. 5: 1–2

Toollâđ tääl Immeel ovdâkovenâd, leppedhân tij suu rähis párnááh. Rähisvuotâ jodettus elimâd, liihân Kristus-uv rähistâm mii já adelâm mii tiet jieijâs adaldâhhân, šievoop-sâg uhren Imelân.

Fil. 4: 4–7

Ilodid ain Hiärást! Eedâm vala ohtii: ilodid! Puáduš tii lädisvuotâ puohâi ulmui tiätun. Hiärrá lii jo alda. Elled huolât masten, mut pyehtid ain tom, maid taarbâšvetted, ruhâdâlmáin, ánumáin já kijttemáin Immeel tiätun. Talle Immeel ráávhu, mii lii puoh ibárdâs paajaabeln, varjâl váimuidâd já jurduidâd, nuuvt et pisovetted Kristusist Jeesusist.

Kol. 3: 12–14

Tij, kiäh lepped Immeel väljejum ulmuuh, paseh já sunjin rákkáseh, kárvudâttâđ tääl váimulii ärmittetteevuotân, ustevlâšvuotân, vyeligâšvuotân, lädisvuotân já kiertâvâšvuotân. Anneed huolâ, et piergiivetted koskânâd, adelid kyeimi kuáimásâd addâgâs, veik tist ličij-uv aggâ láittimân. Tego Hiärrá lii adelâm tijjân addâgâs, nuuvt adelid tij-uv. Mut puoh ruvnân puáduš rähisvuotâ, tastko tot taha puoh tievâslâžžân.



1. Joh. 4: 9, 11–12

Tast Immeel rähisvuotâ almostui mii koskâvuotân, et sun vuolgâttij áinoo Algees maailmân adelid mijjân eellim. Rähis usteveh! Ko Immeel lii mii näävt rähistâm, kolgâp mij-uv rähistid kyeimi kuáimán. Immeel ij lah kihheen kuáassin uáinám. Mut jis mij rähistep kyeimi kuáimán, Immeel piso mist já suu rähisvuotâ lii juksâm mist mittomeerees.

Matt. 7: 24–25

Jeesus iätä:

”Juáháš, kote kulá täid muu saanijd já parga toi miel, lii tego jiärmálâš almai, kote huksij vistles källee oolâ. Rášuarve poodij, virdeh tulvii já korrâpieggâ posoi táálu njeigâ, mut tot ij viirrâm, tastko tot viste lâi rahtum källee oolâ.”

Matt. 19: 4–6

Jeesus iätä:

”Epped-uv lah luuhâm, et Sivnedeijee áalgust rahtij ulmuu almajin já nisonin? Tondiet almai kuádá eejis já eenis já ohtân kálgusis, nuuvt et taat kyevtis šoddâv ohtân uázžin. Suoi iává tääl innig lah kyehti, suoi lává ohtâ. Já maid Immeel lii ohtâdâm, tom iälus olmooš iärut.”

Joh. 15: 9–12

Jesus iätä:

”Tego Eeči lii rähistâm muu, nuuvt lam mun rähistâm tii. Pissood muu rähisvuodâst. Jis nuávditvetted muu pákkumijd, tij pisovetted muu rähisvuodâst, tego mun lam nuávdittâm Iäččán pákkumijd já pisom suu rähisvuodâst. Lam sárnum tijjân taam, et tist ličij muu ilo jieijâd vááimuin já tii ilo

šodâččij tievâslâžžân. Muu pákkum lii taat: rähistid kyeimi kuáimád tego mun lam rähistâm tii.”

## 7. Saahâ

Pappâ sárnu rijjâht teikâ kiävttä juábbáá kuábbáá čuávuvvâš molsâiävtuin. Vihkâmsaavâst kolgâččij kiedâvuššâd čuávuvvâš fáadáid:

- näimilitto Immeel lähjin ja oornigin
- näimilitto pelikuoimij šoddâm saijeen
- peerâ ohtâsâškode vuáđuohtâdâhhân
- ilo já kijttevâšvuotâ
- rähisvuotâ já oskolâšvuotâ
- tobdo já táttu
- addâgâsáánum já -adelem
- huolhij já ustevij toorjâ

Rähis usteveh, NN ja NN (ovdânoomah) . Immeel lii jieš asättâm näimilito. Hiärrám Jeesus Kristus lii ettâm tast: ”Mon Immeel lii ovtâstâm, tom iälus olmooš iärut.” Annee näimilittood passeen já luávkkáámettumin, vâi tot puávtáččij sivnádâs eellimsâd. Orroo vyeligâžžân já kunnijâttee kyeimi kuáimád, vâi ohtâvuotâ siäiluččij näimilitostâd.

Adelee Kristus puáttid páikkásâd. Suu Jieggâ váiguttus tunnuu vááimuin, et rähisvuottâd nanosmičij já šodâččij kienŋâlubbon. Immeel sääni liävus čuovvân ohtsii kiäinud alne. Ruhâdâllee oovtâst já jottee Immeel adelem vuoimijgijn ton kiäinu miel, mon miel sun táttu tunnuu jodettid. Šiev peeivi alestee Immeel pyerivuodâ já paas peeivi turvâstee suu išán.

Kyeddee kyeimi kuáimád noodijd. Jyehhee kyeimi kuáimád iloid já soroid, adelee kyeimi kuáimásâd addâgâs. Palvâlee kyeimi kuáimád toi adalduvâigijn, maid lepee uázžum Imelist. Liävus oskolâšvuotâ, rähisvuotâ já osko Imelân pááihád vuáddun ubâ ohtsii elimâd ääigi. Talle uázžuvettee tubdâd tom sivnádâs, mon Immeel lii pelikuoimijd lopedâm.

Omâhááh já usteveh! Lepped onne illoodmin NN:áin já NN:áin (ovdânoomah) já saatâšmin sunnuu máátkán luhotuáivuttâsâigijn já sivnádâsâigijn. Orrood sunnuu toorjân meiddei cellim aargâst. Mušted sunnuu rukosijnâd.

## TEIKÂ

Rähis usteveh, NN ja NN (ovdânoomah). Onnâš peivi lii elimâd stuorrâ juhlepeivi. Tunnuu pálgáh lává kuáhtám já juátkojeh täst ovdâskulij ohtân päälgin. Mij lep čokkânâm ilodid tiigijn, já ruhâdállâp ohtsii littosâd Immeel sivnádâs.

Rähisvuotâ lii ohtâ puoh kievrâmus tobdo. Mut tot ij lah tuše tobdo. Rähisvuodâst lii saahâ meiddei táttumist já porgâmist. Tast puáhtá šoddâd, já ton oovdân kalga uáinid vääivi.

Immeel lii asâttâm näimilito. Sun rahtij ulmuu almajin já nisonin já sivnedij sunnuu. Immeel jieš lii lädisvuotâ já rähisvuotâ. Sun addel mii tubdâd lädisvuodâ já rähisvuodâ já táttu meiddei, et mij čäittip taid kyeimi kuáimásân. Näävt elimist šoddâv tuottân ilo já lukko.

Pyeremuin-uv näimiliitoin puátih oovdân vädisvuodah. Taid ij koolgâ ucášid, mut kannat oovtâst porgâd toi čuávdim oovdân. Maangah cellim vädisvuodah šaddeh jieččiivuodâstân. Addâgâsáannum já addâgâsadelem lává Immeel adalduvah meiddei pelikuoimijd sunnuu koskâvuodâ tipšomân.

Servikodde addel taan juhlepeeivi tunnui Ráámmát. Occee tast čuovâ ohtsâš kiäinun! Ruhâdállee meiddei, et Immeel jieš sivnedičij ohtsâš elimâd.

[Hyelhih já usteveh! Išedid NN já NN (ovdânoomah), ko suoi iše tarbâšává. Orrood ustevin meiddei talle, ko suoi kuáhtáv vvestikeevâdijd. Tuárjuđ sunnuu išedeijee kiedâigijn, kuldâleijee peljijgijn já iberdeijee váimoin. Kyeddid sunnuu meiddei rukosijdâdgijn.]

### III Vihkâm

---

Servikodde puáhtá čuázžuđ pitái 8–9 ääigi.

#### 8. Koččâmušah

---

Pappâ kojâd irgeest:

Immeel oovdâst já taan servikode / tai tuodâšteije mieldi-  
orodijn kojâdâm tust, NN, táátuh-uv väldid NN kálgunâd,  
leđe sunjin oskolâš já rähistid suu šiev já paas peeivij, ain  
jäämmim räi?

Vástádâs:

Táátum.

Pappâ kojâd myerssest:

Immeel oovdâst já taan servikode / tai tuodâšteije mieldi-  
orodijn kojâdâm tust, NN, táátuh-uv väldid NN käälisnâd,  
leđe sunjin oskolâš já rähistid suu šiev já paas peeivij, kiddâ  
jäämmim räi?

Vástádâs:

Táátum.

#### **TEIKÄ**

Pappâ kojâd irgeest:

Puohtiettee Immeel muádui oovdâst já taan servikode / tai  
tuodâšteije mieldiorodijn kojâdâm tust, NN, táátuh-uv  
väldid NN kálgunâd já čäittid sunjin oskolâšvuodâ já  
rähisvuodâ mieti- já vvestikeevâdijn?

Vástádâs:

Táátum.

Pappâ kojâd myerssest:

Puohtiettee Immeel muádui oovdâst já taan servikode / tai  
tuodâšteije mieldiorodijn kojâdâm tust, NN, táátuh-uv

väldid NN käälisnâd já čäittid sunjin oskolâšvuodâ já rähisvuodâ mieti- já vvestikeevâdijn?

Vástádâs:

Táátum.

## 9. Suormâsrukkoos

Irge addel paapân suormâs (irge já myerssee adelává paapân suormâsijd).

Irge já myerssee pyehtiv luáštádättâđ idduidis oolâ.

Pappâ tuállee suormâs (suormâsijd) paijeen já ciälkká:

**P** Ruhâdâllup ton lito peeleast, mon merkkân taat suormâs lii (taah suormâseh lává).

Puohvâldâlâš Immeel.

Tun jieš lah rähisvuotâ já sivnedah taid,

kiäh turvâsteh tunjin.

Vääldi suojalussâd tom lito.

Iššeed NN já NN (ovdânoomah) eellid näimilitostis

pase táátud miel,

pissood kyeimi kuáimâsis oskolâžžân

já palvâlid kyeimi kyeimis kijttevâš mielâin.

Taam ruhâdâllâp Algaad Jeesus Kristus, mii Hiärá tiet.

**S** Amen.

Pappâ addel iirgân suormâs, já taat piájá tom myerssee čizetkiedâ uárbušmân. Jis suormâseh láá kyehti, pappâ addel vihkâpaarân suormâsijd, já taah pieijâv taid kyeimi kyeimis čizetkiedâ uárbušmân.

## 10. Suormâslopádâsah

Jis irge já myerssee tuáivuv, toimättâs puáhtá ovdil suormâs (suormâsij) suormân pieijâm jotkuđ nuuvt, et irge tuállee myerssein suormâs (suormâsijd) já ciälkká:

Mun, NN,

vááldám tuu, NN,

tääl kálgunân

já táátum rähistid tuu šiev já paas peeivij [eellim loopâ räi].  
Merkkân adelâm tunjin taam suormâs.

Myerssee ciälkká:

Mun, NN,  
váaldám tuu, NN,  
tääl käälisnân  
já táátum rähistid tuu šiev já paas peeivij [eellim loopâ räi].  
Merkkân váaldám tust (adelâm tunjin) taam suormâs.

## TEIKÄ

Iрге ciälkká:

Mun rähistâm tuu, NN.  
Halijdâm jyehid iloid já soroid tuin  
já lede tunjin oskolâš ton räi ko jäämmim munnuu iärut.

Myerssee ciälkká:

Mun rähistâm tuu, NN.  
Halijdâm jyehid iloid já soroid tuin  
já lede tunjin oskolâš ton räi ko jäämmim munnuu iärut.

## 11. Näimilito nanosmittem já pelikuoimij sivnedem

---

### Näimilito nanosmittem

**P** Tuoi leppee tääl váldám kyeimi kuáimád pelikyeimin já tubdâstâm tom julgâlávť Immeel muáđui oovdâst já taan servikode (tai tuodâšteijei) mieldiorodijn. Vihkâmsuormâs lii adelum tunnuu näimilito merkkân. Immeel já suu servikode palvâleijen nanosmitám littood já kulluuttâm tunnuu pelikyeimin.

### Pelikuoimij sivnedem

Vihkâpaarâ luáštádât idduidis oolâ, jis máhđulâš.

**P** [Immeel, almalâš Eeči,  
adelus tunnui illoos já sivnádâsâs.

Immeel áinoo Alge  
liävus pyerivuodâstis tunnuin nuuvt ilo ko murrâš peeivij.

Immeel, Pase Jieggâ,  
áásus tunnust já kulgâttus nuvâhännáá jieijâs rähisvuodâ  
tunnuu váimoid].

Sivnedus tunnuu puohváldálâš já ármugâs Immeel, Eeči já  
(+) Alge já Pase Jieggâ.

### **TEIKÂ**

**P** [Immeel Jieggâ läidejus tunnuu,  
Immeel vyeimi varjâlus tunnuu,  
Immeel vijsesvuotâ máttááttus tunnuu,  
Immeel kietâ suojâlus tunnuu,  
Immeel luoddâ adelus tunnui sunde].

Sivnedus tunnuu, NN já NN, puohváldálâš já ármugâs  
Immeel,  
Eeči já (+) Alge já Pase Jieggâ. Amen.

### **TEIKÂ**

**P** Hiärrám Jeesus Kristus ármu já Immeel rähisvuotâ já Pase  
Jieggâ uásálâšvuotâ liävus tunnuin.

**S** Amen.

## **12. Salmâ**

Saalmâ saajeest puáhtá leđe eres hiäivulâš muusik.

## 13. Ohtäsâš ovdârukkoos

Rukkoos puáhtá ráhtid meiddei ríjjáht. Mieldiorrooh pyehtih váldid uási rukkoos ráhtimân.

### **P/O** Ruhâdâllup.

1. Immeel, ráhis almalâš Eeči. Ruhâdâllâp sivnádâsâd NN:n já NN:n, kiáh lává ovdâstâd vihkum näimiliiton. Sivned sunnuu pääihi. Nanosmit sunnuu koskâsii ráhisvuodâ já adde tom lasanid. Adde sunnui ovdâsvástádâstobdo já oskolâšvuodâ. Iššeed sunnuu vyeittid kivsádâsâid. Varjâl sunnuu rummâš já siälu. Joodeet sunnuu ubâ eellim ääigi já adde iššâád eellim vädis peivijd. Nanosmit sunnust osko já tuáivu. Tuálvu sunnuu ohtii avalii pááikán, kirkesvuotân. Kuulâ rukosân Hiärrám Jeesus noomâst.
2. Puohváldálâš Immeel. Jis tun jieh huksii táálu, te huksejeijeeh pargeh tušij tiet. Oovtâst täid pelikuoimijd kyeimi kuáimâsis ráhisvuodâin já passoot sunnuu näimilito noomâd kunnen. Iššeed sunnuu huksid pääihi, mast osko, tuáivu já ráhisvuotâ haldâččeh. Adde sunnui Pase Jieggâd, nuuvt et suoi iäláččâin ráávhust tuu sivnádâsâst. Iššeed sunnuu kištottâllâđ oskoost já tuálvu sunnuu ohtii alme pááikán. Kuulâ mii Jeesus Kristus, mii Hiärá tiet.
3. Immeel, mij kijttep tuu ráhisvuodâ adalduvâst. Sivned NN já NN, kiáh lává ovdâstâd naaijâm. Mij kijttep tuu tast, et suoi ráhistává kyeimi kyeimis, lyettiv kyeimi kuáimâsis já táttuv anneđ kyeimi kyeimistis huolâ čoodâ elimis. Ruokâsmit sunnuu šoddâđ ain aldasub ohtâvuotân, nuuvt et mihheen ij iäruttiččii sunnuu. Iššeed sunnuu puoh elimis puudâin ráhistid kyeimi kyeimis já pissod kyeimi kuáimâsis oskolâžžân. Varjâl sunnuu puácuvuodâst já luhottesvuodâin, puohâst, mii puávtáččij vahâgittid. Jis miinii killáamušâid



tiäivá, adde tom tuálvud sunnuu ain aldeláá kyeimi kyeimis já tuu. Taam ruhádállâp Jeesus Kristus peht.

4.

**P/O** Immeel, tun lah asâttâm näimilito. Tun pasottah páikkán mieldioromijnâd. Mij ruhádállâp tuu: ovtâstit taid pelikuoimijd kyeimi kuáimásis rähisvuodáin já sivned sunnuu näimilito noomâd kunnen. Mij ruhádállâp tuu.

Eeči teikâ enni

Tun adelih ohtii munnui pärnáidân. Kijttep ton iiloost, mon sij láá puáhtám mii elimân. Sivned sii, ko sij uázžuh jieijâs pääihi já perruu. Varjâl sii puoh paain. Adde sijjân sovâlii mielâ já iššeed sii áánnud já addedd addâgâs. Mij ruhádállâp tuu.

Kiinii oobijn já viiljâin

Onne mij kijttep tuu pärnivuodâ päihistân. Oro NN:áin já NN:áin já varjâl sunnuu ton määdhist, moos suoi lává tääl vuálgám. Iššeed mii eelliđ alda kyeimi kuáimán. Mij ruhádállâp tuu.

Kiinii faddârijn

Kaastâst tun lopedih sivnádâsâd ristpáárnáássân. Sivned vala-uv suu já sunjin rákkásumos ulmuu. Iššeed sunnuu mušted, et kaastâ áármun uázžu ain uddâsist maccâd. Mij ruhádállâp tuu.

Kiinii ustevijn

Tun lah laidim NN já NN oohtân. Sivned sunnuu rähisvuodâ. Iššeed sunnuu pissod oovtâst elimis loopâ räi. Adde mijjân ilo ustevvuodâstân meiddei puáttee ääigi. Mij ruhádállâp tuu.

**P/O** Almalâš Eeči. Kijtto, et kuulah rukosijdân. Kyeddip täid nuorâid / täid pelikuoimijd já jieččân tuu haaldun. Tuálvu mii ohtii alme pááikán. Kuulâ mii Algaad Jeesus Kristus, mii Hiärá peht.

**S** Aamen.

## 14. Mii Eeči

---

Hiärá rukkoos ciälkkoo oovtâ jienân.

**S** Mii Eeči, kote lah oolmijn.

Pasottum liävus tuu nommâ.

Puáduš tuu vâldikodde.

Šados tuu táttu meid eennâm alne nuuvtko almeest.

Adde mijjân onnáá peeivi mii jyehipiäiválii leeibi.

Já adde mijjân mii suddoid addâgâš,

nuuvtko mij–uv addâgâš adelep toid,

kiäh láá mii vuástá rikkom.

Já ele joođeet mii kivsádâsân,

mut peesti mii paast.

Tastko tuu lii vâldikodde já vyeimi já kunnee nuvâhännáá.

Aamen.

## IV Lopättäs

---

### 15. Sivnádâš

---

Sivnádâš maŋa pappâ addel pelikuoimijd Ráámmát.

**P** Hiärrá sivnedus tii já varjâlus tii.

Hiärrá čuovvâduš muáđuidis tijjân

já liävus tijjân ármulâš.

Hiärrá jurgâlus muáđuidis tii piälán

já adelus tijnâ rávhu.

Eeji já + Alge já Pase Jiegâ noomân.

**S** Aamen.

## 16. Vuolgâtem

---

Avžuuttâs iättoo tallan ovdil vuolguu.

**P** Vyelgid rávhusť já palvâlid Hiärá ilodin.

## 17. Loppâmuusik

---

Loppâmuusik puáhtá leđe salmâ, laavlâ já/teikâ čuojânâsmuusik.